

趙海仙醫案精華

上海秦伯未編纂

癆損

木火凌金。咳逆不已。已歷半年。榮衛交虛。聲音不揚。又經兩月。書云。金虛則鳴。金破則啞。此之謂也。久延防入損怯。

當歸 白芍 柴胡 訶子皮 百合 款冬 枇杷葉 山藥 沙參 蘇梗 甘草

穿衣 蟬衣

抑鬱傷肝。肝火灼肺。咳逆頻仍。迭次見紅。精神萎頓。穀食減少。脈象弦細而數。損怯之根已露。際此火令司權。仍防血溢爲囑。

北南沙參 甘草 款冬 川貝 丹皮 藕片 雲苓 百合 扁豆衣 桑葉 冬瓜子

糯稻根鬚

先天素賦不充。後天脾土不振。加以木火刑金。欬逆頻仍。聲音不揚。喉間

作痛已延兩載。損怯已露。姑擬一方。以邀天相。

北南沙參 甘草 扁豆衣 銀蝴蝶 紫苑 冬虫夏草 款冬 烏扇 百合 炙枇杷花
糯稻根鬚

素質先天後天俱屬不足。加以木火凌金。故欬逆頻頻。脾土不健。以致大
便泄瀉。咽痛音啞。脈息細數。已延一載有餘。損怯之勢已露。姑擬補土生金法。
以冀轉重爲輕耳。

百合 野黃芩 扁豆衣 山藥 冬瓜子 川貝 陳皮 桔梗 炙枇杷花 糯稻根鬚
人參 白朮 茯苓 甘草

氣虛鬱滯。血凝成瘀。近加暑熱傷於經絡。絡傷則血溢盈碗。擬方徐徐圖
之。

生地 川貝 旋覆 側柏 杏仁 鬱金 桑葉 丹皮 橘絡 新絳 降香屑

陽絡受傷。血從上溢。欬逆時形。肺氣受戕。證近三載。間有滑洩夢遺。所幸

脈象細軟。與症相合。近值夏至欲臨。不可不預爲防溢耳。

沙參 生地 百合 款冬花 茯神 藕節 白芍 炙草 旱蓮 秋石 石斛 茅根

曲直太過。不時下侮土位。故生泛惡。木不畏金而直上。以致欬逆時形。曾經失血。甚則作嘔。是子累母也。脈象細數。久則恐入損途。

沙參 阿膠 石斛 半夏粉 茯苓 甘草 杏仁 冬花 桑葉 竹茹 陳皮 枇杷葉

木火凌金。欬逆不已。陽絡損傷。火逆血溢。形氣消索。脈象細數。久延防入損怯之途。

訶子皮 旱蓮草 萸霜 山梔 丹皮 茅根 海浮石 側柏葉 青黛 石斛 桑葉

藕節

水虧於下。火炎于上。欬逆失血。側眠音啞。骨中蒸熱。兩脈細數。勞怯之機已露。擬方以盡人力。

鱉甲 青蒿 麥冬 沙參 半夏 鷄子清 旱蓮 女貞 石斛 桑葉 杏仁 川貝

枇杷葉

木扣金鳴。絡傷血溢。陰分受傷。內熱頻來。腎不納氣。動則氣短。脈象細數。而弦。左脇間有時疼痛。仍防湧吐。擬咳血方加味。

煨訶子肉 黑山梔 丹皮 杏仁 旱蓮 甘草 茅根 括蕤仁去油 海浮石 青黛

石斛 紫苑 藕節

肺主氣而屬金。腎屬水而惡燥。金水交虧。木無所畏。反挾心火以上炎。以致欬逆失血。精神疲而不振。脈象弦細帶數。仲聖有云。男子脈大爲癆。極細亦爲癆。其理然也。速當節勞靜養爲要。

北南沙參 麥冬 阿膠 川貝 百合 冬花 扁豆 冬瓜子 杏仁 苡米 桑葉 茯苓

梨皮 枇杷葉

天下無逆流之水。人身無倒行之血。水逆流者因乎風。血倒行者因乎氣。氣逆則血溢矣。酌擬育陰潛陽。壯水制火之治。

寶珠 山茶花 石斛 側柏葉 乾生地 藕節 十灰散

兩天不足。木扣金鳴。入暮燒熱。清晨盜汗。脾陽不振。以致便溏月餘。再防延入損怯之門。

黨參 甘草 陳皮 山藥 於朮 黃芩 枇杷葉 茯苓 白朮 桔梗 牡蠣 川貝 紫苑

肺虛欬逆。曾經失血。辰下子盜母氣。氣喘不能安臥。脈虛弦而滑。症近損怯之途。非易圖功。

紫石英 白芍 南竹子 蛤殼 甘草 川貝 胡桃肉 附片 於朮 冬花 百合 人參 陳皮

曾經失血。邇來欬逆。咽痛音啞。寒熱往來。已延年餘。肺痿已著。擬方徐徐圖之。

炙甘草 桔梗 麥冬 生地 南北沙參 阿膠 油桂 麻仁 紅棗 童便

■ 癲狂癇

肝旺胆虛。痰熱內擾。遂令神思恍惚。語言舛錯。笑哭無常。甚則發狂。脈象沉細而滑。已經九月。書云。癲症是也。病久根深。難以速效。非徐圖不可。

半夏 南星 萆仁 川貝 玉金 桑葉 滌飲散 茯神 磁石 橘紅 蘇梗 防己

丹皮 燈心炭 鷄心胞

自患癇症。已曆多年。邇來愈發愈甚。語言舛錯。神思恍惚。由癇而轉癲。根蒂過深。徒恃藥餌無濟也。姑擬一方以觀進退。

辰砂 老燕珠 黑鉛 水銀煨明雄 共研煉蜂蜜成丸開水送下

五臟有五癇。惟羊癇屬肺金。乃由金虛不能制木。木旺而反刑金。故成羊癇。發時右邊爲甚。延及四年之久。根蒂已深。今非煨煉諸方。不克却病。

生羊齒 青礞石 南星 風引散 生羊頭骨 青龍齒 紫石英 磁石 牛黃 製白附子

雞心包 燈心炭 風化硝 鯉魚胆

另服五癰丸用薄荷湯送下

抑鬱傷肝。驚恐傷胆。熱痰內蘊。記誤舛錯。以致神志恍惚。脈象弦滑。擬方以緩圖之。

萸霜 胆星 橘紅 茯神 真熊胆 梔子 石斛 半夏 炒菊花 丹皮 玉金
苦竹根

驚恐傷胆。胆虛蘊痰。肝傷化風。釀成癰症。已歷十年之久。近來三年尤甚。書云癰者間也。因其發有間斷也。脈象虛弦而滑。病久根深。非徐圖不可。

玉金 天麻 龍齒 茯神 勾藤 明礬 半夏粉 萸霜 胆星 牽正散 荷葉筋
燈心炭 蜂翅茶 白薇 橘皮絡 雞心胞

懷珠六月。卒然神昏仆地。牙關緊閉。筋抽肢搖而蠕動。經所謂暑癰是也。擬方速開清竅。庶有轉機。否則防厥陷致變。

天麻 萸藜 茯神 玉金 橘紅絡 桑葉 竹茹 牽正散 石決 鉤勾 荷葉筋 白薇

菊花

肝旺胆虛。痰熱內擾。遂致言語錯亂。神思恍惚。哭笑無常。噯噫頻仍。癲症已著矣。

夜交藤 半夏 茯神 龍齒 蘇梗 橘絡 川貝 蟲蔓草 秫米 蒺藜 南星 赭石

玉金 血珀

腰痛

腰者腎之府。腎氣不充。濕痰入於經絡。以致腰間作疼。已歷二年之久。擬方徐徐圖之。

牽正散 木瓜 製半夏 桑葉 川斷 茯苓神 金毛狗脊 絡石藤 橘皮絡 蒺藜

杜仲

腫脹

濕爲陰邪。本屬無形之氣。脾爲溼困。致失運化之權。是以腹大而脹。臍突

腸鳴穀食不思小便甚少。卽冀轉解爲佳。否則恐成單腹脹也。

防已 砂蔻衣 赤苓 澤瀉 腹皮 五茄皮 茅朮 雞內金 香櫞皮 附片 乾姜

桂枝 冬瓜皮 巴豆皮

腫本乎水。脹本乎氣。水溢皮膚。氣鬱脘腹。以致腫脹日增。小便不利。法當和膀胱之氣。氣化則水道通調。腫脹自可漸減也。區區管見。僅陳一二。倘值同志。庶有依歸。

桂枝 雞內金 防風 木瓜 蟾衣 砂蔻衣 大腹皮 蘇葉 茯苓皮 茅朮 橘皮

澤瀉 冬瓜皮

土爲木乘。脾爲濕困。陽氣不能運行。陰霾得以四布。以致運納失和。腹脹漸大。足跗亦腫。小溲不利。速當樂志安閑。權停商賈。俾木得條達之氣。脾無剋制之害。庶可漸入佳境。

厚朴 腹皮 木香 澤瀉 冬瓜皮 桂枝 草蔻 防已 陳皮 赤苓 茅朮 木瓜

乾姜 雞內金

太陰不主轉運。陽明不能宣達。升降失常。水穀之濕內蘊。清濁由此混淆。腫脹由此日甚。陽氣亦微。小便甚少。食入之後。脹不可耐。再延恐有單腹之虞。

半夏 枳實 防已 干姜 砂壳 桂枝 苓皮 內金 附子 蔻壳 橘皮 澤瀉 於朮
腹皮 敗鼓皮

□ 痢 疾

痢下純紅。後墜頗甚。法當調氣行血。俾後重便膿漸愈。擬用歸芍大劑湯加味主之。

當歸 白芍 佩蘭 海南子 萊菔子 黃連 木香 穀芽 車前 陳紅茶 製香附
煎服溫脾丸三錢

胎前下利。延及產後。惡露不行。腹中疔痛。症勢殊屬棘手。切不可服生化湯。服則痢必增劇。酌擬一方。獲效爲順。

澤蘭 茅朮 川芎 甘草 黑荆芥 白芍 澤瀉 血珀

暑濕蘊於曲腸。致成赤白痢。胃氣大傷。穀食少減。久延有土敗木賊之虞。擬七味白朮飲加味主之。

於朮 藿香 防風 白芍 陳倉米 甘草 木香 荷蒂 南沙參 茯苓 葛根

素本脾胃兩虛。近加新涼。引動伏邪。身熱不清。紅白滯下。穀食不思。脈象數大。擬逆流挽舟法。獲效乃吉。

前胡 赤苓 川芎 粳米 羌獨活 厚朴 桔梗 荷蒂 秦柴胡 枳殼 甘草 煨姜

脾泄三年。客秋增劇。皆由肝木乘脾。火不生土。以致濕熱互結。胸中脹痛。汨汨有聲。脈象沉弦而濇。再延防有腫滿致變。

半夏 山藥 白芍 糯稻根 陳皮 甘草 附片 荷葉蒂 雲苓 橘紅絡 冬瓜子

白朮

經云。腎開竅於二陰。久痢必傷水臟。加之命陽不充。不能生化脾土。以致

陽虛失健運之權。交寅分則腹痛而作痢脈象弦細無神面色萎黃。已歷半年之久。其爲腎瀉無疑。再延陽氣愈虛。恐生腫脹致變。擬用通陽攝下法。緩以圖之。

吳萸 肉蔻 黨參 黃芪 柴胡 炙草 五味 冬朮 大棗 破故紙 升麻 白芍

附子 荷蒂

暑濕蘊于曲腸。致成滯下。紅倍于白。腹中痛墜。穀食不思。慮其胃敗而成噤口。

木香 砂仁 酒黃芩 赤芍 山楂 地榆炭 萊菔英 荷蒂

由瀉而痢。是戍病尅癸也。已經旬日有餘。表邪未清。邇來正氣已損。穀食不思。恐成噤口之患。

橘皮 佩蘭 甘草 荷蒂 羌獨活 防風 桔梗 陳米 太子參 厚朴 赤苓

患痢三載。已成休息。下凍則墜。便糞則暢。前來月經數次。肝鬱氣滯。時形

脇痛。此屬兩虛症也。

訶子 當歸 黨參 白芍 煨葛根 橘皮 甘草 粟壳 草果 霞天曲 赤苓 半夏
黃芪 於朮 荷葉蒂

五 積

腎之積在少腹。如奔豚之狀。或上或下。發作無時。久而不愈。則令人喘少氣。男子七疝。女子帶下瘕聚。宜奔豚丸。

乾姜 白芍 半夏 黃芩 甘草 川芎 當歸 姜棗湯泛丸

肺之積在右脅下。覆大如杯。久而不愈。令人灑淅寒熱。欬喘發肺癰等症。宜息賁丸。

洋參 葶藶 桑葉 丹皮 吳萸 肉桂 半夏 甘草 水泛爲丸

脾之積在胃脘。腹大如盤。久不愈。令人四肢不收。發黃疸。宜痞氣丸。

川烏 花椒 乾姜 附片 肉桂 赤石脂 水泛丸 硃砂爲衣

肝之積在左脅下。大如杯。有形如足。宜肥氣丸。

柴胡 川連 乾姜 川椒 甘草 陳皮 川烏 昆布 洋參 皂角 巴豆霜

心之積在臍上。大如臂。上至心下。宜伏梁丸。

洋參 於朮 枳壳 製半夏 醋泛爲丸

■ 便結

命火不足。寒結下焦。正氣不能傳送。遂大便秘結。數日一行。溏後帶滯。是寒結之明徵也。擬溫下湯加味主之。

鹽炒新會皮 甘草 附片 白蜜 半硫丸

熱結大腸。津液不足。以致大便秘結。相間候餘一次。便時極爲乾燥。是熱之故也。酌以潤燥生津爲治。

麥冬 白芍 熟地 郁李仁 杏仁 天冬 當歸 瓜蒌

■ 齒齲

操勞過度。肝胃之火上升。齒齬勢如湧泉。血色鮮紅。脈數不勻。證防汗厥生變。擬玉女煎法以盡人力。

生地 淮牛膝 白茅根 犀角 石斛 地骨皮 丹皮 荷葉

□ 鼻淵

素質稟賦不充。肝胆濕熱上騰。以致鼻流濁涕。如淵不絕。已延三年。病久根深。非徐圖不可。

蒼耳子 白芷 山枝 杏仁 通草 木筆花 薄荷 川貝 菊花 桔梗 滑石 絲瓜絡
另服鼻淵丸

□ 梅核氣

操持過度。抑鬱傷肝。肝臟厥陰之氣。由胃系上升于喉。喉間不利。狀如物阻。咯之不出。嚥之不下。書云梅核氣是也。速當掃盡塵氣。自開懷抱。庶可與藥餌並濟。

蕤皮 蘇梗 貝母 桑葉 丹皮 昆布 射干 綠海粉 橄欖核 陳皮 半夏 杏仁
肝肺之氣不舒。升降之機紊序。上逆于會厭之間。致咽嗑爲之不利。狀如
物阻。咯之不出。書云梅核氣是也。擬方善圖。

海粉 丹皮 桑葉 蘇子霜 松蘿茶葉 射干 蛤粉 竹茹 青果核 昆布 半夏粉
茯苓 川貝

噎膈反胃

肝氣不升。肺氣不降。升降失常。以致喉間不利。狀如物阻。食入不運。噦吐
酸水涎沫。脈象弦滑。有噎膈之漸。姑擬開闔法治之。

畢撥 鮑魚末 川朴 霞天曲 花椒生薑煎湯泛丸

肝氣逆行反胃。胃氣不克下行。反而上逆。遂令食入反出。先穀後痰沫。已
經五候。擬半夏乾姜法爲治。

半夏 乾薑 蘇梗 玉金 茯苓 石英 牛蒡草 伏龍肝 長流水煎

肝氣逆行。胃氣失降。遂致迭次嘔吐。甚則噤食。冷飲居多。顯係胃寒。已經三年。近加肝火灼肺。乾欬無痰。又經半載。擬方兼治。

參鬚 冬瓜 白芍 半夏 灶心土 柴胡 烏梅 雲苓 木瓜 當歸 赭石 紫苑
花椒 橘皮絡

肝胃不和。脹痛嘔吐。甚則食入反出。若不速治。有反胃之虞。擬不換金正氣散法爲治。

雅連 半夏 茅朮 厚朴 橘皮 甘草 吳萸 藿香 茯苓 蘇梗 烏梅 煨姜
操勞過度。抑鬱傷肝。肝氣不平。肺氣不降。以致喉間不利。食物維艱。口吐涎沫。年近古稀。脈象弦滑。症情是屬膈象。擬方徐圖。以盡人力而已。

半夏 茯苓 佩蘭 杷葉 麥冬 蘇梗 杏仁 橘皮絡 阿膠 乾姜 川貝 百合
情懷欠爽。氣鬱生痰。痰生則塞而不通。氣鬱則升而不降。於是道路不寬。食入不利。年越七旬。防入神思間病。